

جریدہ علیہ

مشفقت جلیلہ اسلامیکہ جریده رسمیه سیدر
۹ جمادی الاخری ۱۳۳۸ و ۲۹ شباط ۱۳۳۶

شعبی سنہ

اون بش کونده بر نشر اولنور

عدد ۵۵

دارالحکمة الاسلاميه اعضاسندن فرید بك افنديك

آيا صوفيه ده کی موعظه لری خلاصه سی

اعوذ بالله من الشيطان الرجيم . بسم الله الرحمن الرحيم . (والهکم اله واحد لاله الا هو الرحمن الرحيم) صدق الله العظيم ..

جناب حق قرآن حکیمندہ بویوریورک (والهکم اله واحد) سزک اللهکز بردر . (لاله الا هو) اوندن باشقه عبادتہ احق والیق هیچ بر معبود یوقدر . معبود بالحق اودر . (الرحمن الرحيم) هم رحمن ، هم رحیدر . جناب حقت رحمانیق عالم ، رحیمیق خاصدر . رحمندر ، یعنی لطف واحسانی عام وشاملدر . اولیه اولماسه کندیسنه قارشى طغیان ایدن کیمسه لری اهلاك ایتسی لازم کلیرایدی . حال بوکه اولیه یاپمایور . هرکنی احسانه مظهر ایدیور .

(والهکم اله واحد ...) امام اعظم حضرتلری (فقه اکبر) ندہ دیورک : (والله تعالی واحد لامن طریق العدد ولكن من طریق انه لا شريك له) اللهک وحدانیق بزم بیلدیکمز وحدت عددیه ایله دکلدرد . چونکه علم نقطه نظرندن هر معدود محدوددر . حال بوکه جناب حق حصر عددی دائرہ سنه کیرمکدن منزہ ومتعالیدر . اللهک وحدانیق دیمک ، شریکی ، نظیری یوق دیمکدر . جناب ذات باری بزم ادراکمزک یتیشسه میه جکی شیرلی ، بزم آکلایه جغمز صورتده تفهیم بویورمش . سته الله بو منوال اوزره جاری .

صوکره الله . ینه قرآن حکیمندہ (سورة نحلده) بویوریورک : (الهکم اله واحد فالذين لا يؤمنون بالآخرة قلوبهم منكرة وهم مستكبرون) سزک اللهکز اله واحددر . آخرته ایمان ایتمین کیمسه لرك قبلیری ذات الوهیق انکار ایدر . تصدیقندن ابا ایدر . اولیه اولان کیمسه لردہ استکبار ایدرلر . یعنی سائقه کبر ایله تصدیقندن ، عبادتن ، طاعتندن انحراف ایدرلر . تصدیق الوهیتہ یاناشماق ... انسانلرك بو درلوسی ده واردر . نعوذ بالله تعالی . بو ایکی شی یعنی انکار واستکبار انسانلرك موجب هلاکی اولمشدر . بو ایکی خصلت ذمیمه سائقه سیله صدر اولده اولیه شیر وقوعه کلشدرکه انسان نقلندن

استحیا ایدر . جناب پیغمبره قارشی وقوع بولان تجاوزات کستاخانه، منافقینک، مشرکینک یایدیغی شیرلر، هپ بو خصلتلرک، برده اونلره الضمام ایدن حسدک نتیجه سیدر .

صیره سی گلش ایکن حسد حقنده بر ایکی سوز سولامک ایسترم . افراد جمعیتک حسددن تبریی بر لازمه اجتماعیه در . جمعیت بشریه محبت متقابله اساسی اوزرنده طورور . بر ایچمزدن هر هانکی بر کیمسه نك موفقیتنه حسد ایتمه ملی یز . حسد چوق فناشیدر . بوندن مذموم بر خلق بوقدر . ایی ، فداکار ، مجاهد کیمسه لر مزله افتخارا ایتمه ملی یز . هر هانکی مساکده اولورسه اولسون ایی بر آدمک وجودی مابه الافتخار من اولمی در .

ایشته انبیای دیشانه قارشی مشرکینک منشاء عداوت و تجاوزی ده بو ایکی نقطه ایدی . مشرک لرله ، منافق لر : — حاشا — بورسول الله دینیلن آدم کیم اولیور . اوده نیم کی آدم . دون بنله او طوروب قالقیوردی . بوکون « سمان بکا وحی الهی کلدی » دییور . بن نصل بوکا اینانور ، نصل دینی قبول ایدرم ؟ صکره افتراده ایتدی لر . الله ، حبینه قرآنده بوکی حسدلردن استعاذه یی امر ایدیور . ذات اقدس رسالته قارشی عوام کالهوم طرفندن یاییلمه دق اذی قالمادی . بو حسدلرک نسل خیتی حالا منقطع اولما مشدر . کوز دیکد کلمی آدملر حقنده نه لر اوی دورور لر ! اللرنده : عیاش ، قلاش ، اوباش ، جرار ، مکار ، عیار ، طرار کی اسملر ویرلمش بر چوق زهرلی اوقلر واردر . بونلری اوکارینه قویار لر . بو وجدانسلر هیچ بر افترادن چکینمز لر . ایچلری فساد طولودر . شیطانله یالکیز قالدقجه متصل مفسدت تعلم ایدر لر . بر آده اسناداته باشلادیلری اولابواوقلرک برینی آتار لر . راست کتیره مدیلری ، اوبرینی آتار لر ، صوکرده دیکرینی ، الح ... او بیچاره آده اسناد ایده جک برشی بوله مدیلری ، زوالینک حریم عصمتنه قدر تجاوز ایدر لر . بوله کیمسه لر نه دیه لم . الله اصلاح ایلسون .

حاصلی بو ایکی ردیله دن توقی هر کس وجیه ذمت بیلملیدر . چونکه سعادت امت بو نقطه ده در .

ایشته الله وحدانیتی ، بر اولدیغی ، شریک ونظیری اولمادیغی قرآنده بزم بیلدی ریور . کتاب سماوی اولان او کتاب اقدسده بویوریور که : (والهکم اله واحد ...) سن اللهی .

طانیورمیسک؟ بووحي الهيدر، قبل سبحانیدن وحی اولومش بر کتاب اقدسدر ... بونی دیورسهك آرتیق باشقه دلیل آرامهیه حاجت یوقدر . مؤمن موحد ایچون بوقدری کافی . لکن برچوق آغیزلردن شهیرلر ایشیدیلور . مناقشه ایدیلور . بویله آدمیر اکسیك اولمش می؟ اوتیه کیلر کی بوملحدلرک نسل خییته منقرض اولماز . هیئت اجتماعیه نی تمامیه بونلردن تطهیره قالدیشمق عثله اشتغالدر . چونکه ایلرک قیمتی تقدیر ایچون فنالرده اوله جق . کافر اولمايحه مؤمنك قیمتی آکلاشیلماز . ملحد اولمايحه موحدك قیمتی تقدیر اولوماز . بوتون انسانلر ای اولسون دیرسه کنز صوکره اسماء الهیه معطل اولور . ایسی اولدینی کی، فاسق ، فاجری ده لازم . مقتضای حکمت بودر .

اوت افندم ، قرآنی تصدیق ایدیورمیسک ؟ نه کزر ! سن قرآنك انجق حروف و ظروفی کوریورسك . او حروف و ظروفده کی معنای جایی تفکره ، اومعاندن تأثره استعدادك یوق . چونکه قلبك حیفیت چارشیمی کی . ولوله انكارك صدای مزعجی استماع حق و حقیقه مانع . شاعر نه کوزل سویله مش

عروس حضرت قرآن نقاب آنکه براندازد

که دارالملک ایمانرا مجرد بینداز غوغا

عجب نبود که از قرآن نصیبی نیست جز نقشی

که از خورشید جز گرمی نبیند چشم نابینا

شیمدی آرتیق قرآنه قارشى سوء ظنده اولانلر قرآنی دکل ، کندیلرینی دوشونورلر . شاعر ، قرآنی بر عروس نازینه ، برکینه تشبیه ایدیور . کلین یوزندن دووانی آنجق دارالملک ایمان، ولوله جدالدين آزاده بولوندينی زمان رفع ايدر . منکرلرک نقوش ظاهره قرآندن باشقه برشی کورمه ملرینه تعجب ایدیله ملی . بویله برآدم قرآنی الیه آله اونك حروف و ظروفندن باشقه برشی کورمز . معانی جلیله سنك مزایاسنه واقف اوله ماز . زیرا کوزی کور اولان آدم یالکزر کونشك حرارتی حسن ايدر . نورینی ضیاسنی کورمز . فی الحقیقه کور کونشك ضیاسندن نه استفاد ايدر ؟ کونشك وجودینه آنجق حرارتیه حکم ايدر . ایشته قرآنك حروف و ظروفی داخلند قالانلر، قرآنه باقیجه ساده جه کلانندن، مذهب جلدندن باشقه برشی کوره مزلر . قرآنك نور حقیقتی قلیلرند تجلی ایتز . چونکه

دارالایمانده محاربه اولیور . اوراده شیطانلر (فوت بول) مسابقه سی یاییور . نفس هوا و هوسله طولمش . هربری برهوا چالیور . بویله آدم ایمانک نورندن البته حصه مند اوله ماز . اولا ساحه ایمانی (فوت بول) مسابقه سنه ترك ایتاملی . قرآنی خضوع و خشوع ایله اله الملی .
[ان شاء الله هب بونلری سویله به حکم . الله سویله تیرسه .]

حکیم (سنائی) نک ده بومآله کوزل برقطه سی وارد که مالی شودر :
اوت کور آفتابی کورمز . آنجق حرارتیله وجودینه حکم ایدر . بصر بصیرته عمی
طاری اولان ضال و مضلده قرآنک یالکز ظواهرینی کوریر . قرآندن متأثر اولمق ایچون
ایمان ، ادب لازمدر . ناصیل که برکیمسه هوا ی نفسانی به خادم اوله جق بر مجلسه کیدر .
تمامتله اومجلسه آدابنه رعایت ایدر . مثلاً بر شرق دیکله مک لازم کلسه بوتون حضور
قلبی بریره جمع ایچون نه یایمق ممکنسه یاپار . قرآنه کلنجه نه ادب طانیر ، نه برشی . اوکا
قارشیده بویله خشوع و خضوع اوزره اولسه ک آ . منکرلر :
— قرآنده نه وار صانکه ؟ بسیط بسیط فکرلر . بونکله ایش اولورمی ؟ بوزمانده
بزی تطمین ایدرمی ؟ .. دیورلر .

ایشته بو ، ضلالک انجیبی در . دها طوغریسی ادیسزلکدر . مع مافیه بورذالت
یکرمنجی عصرک مفاخرندن دکلددر . دها چوق اول بوهرزدلر سویلنمشدر . حضرت
مولانا زماننده منکرین مثنوی شریفه قارشى طغیان ایتدیلر :
— بوندر ؟ دیدیلر ؟ مولانا برطاقم قورد ماصاللرینی طوپلامش . عالمک کوزینی
بویایور ...

حضرت مولانا بوندن متأثر اوله رق بوعتراض بی ادبانه نک یالکز مثنوی به قارشى
دکل ، حضرت قرآنه قارشیده در میان ایدلیدکی سویله یور .
الله ذوالجلالک کتاب سماویسیده بومنوال اوزره نازل اولدی . حضرت فرقان حکیمده
کفره خیره بویله طعن و تشنیع ایتدیلر . نه دیدیلر ؟
— آدام! .. بونلر برطاقم ماصاللردن ، اساطیردن عبارتدر . بر حقیقت قوق العادم یوق ...
حال بوکه انسانی اصل ضلاله دوشورن ، یاگیلتان بودر .
— ایکی یاشنده چوجقلر بونی آکلار . اگر اولاد عربدن ایسه ، یاخود لسان عرب
آشنا ایسه ...

باق شیطان لعین ناصیل اورییور !

— نه وار سانکه ؟ هانی کوکلره چیقارده جق قیمتی زرده ...

نعوذبالله . نه لر سویله مشلر . نه بدطینتلهر کلوب کچمش . نه ملحدلهر دیللهر اوزاتمش . یعنی بومسکرلر شو عصرک یادکارلری دکل . بونلر اونسل خیشک جاهل ولدلهری . دها نه لر وار !

— ایشته قرآنک مندرجاتی : آدمک یارادلمسی ، جتندن اخراج ایدیلیمی ... بو بویوک برشی دکل . صوکره قوم هادک ریخ صرصرله هلاکی ... یعقوب ایله یوسفک حکایه سی ، ذلیخانک قصه معلومه سی ، اسماعیلک وقعه سی ، اصحاب فیل وقعه سی ... بونلر هر کسک بیله یکی شیلر ... ایشته سزک قرآن دیدیکلر بویله اساطیر اولین ، قصص و حکایات ... حاشا ، حاشا . فقط نه چاره ، بونلری سسویله مه ده ضرورت وار . بونلر هپ جهل و حماقت . دها طوغریسی ادبسنلک . نه دن بویله اولیور ؟ بساطتندن . صوکره حضرت مولانا بر حدیث شریف نقل ایدیور : (ان للقرآن ظهراً و بطناً ...) قرآنک یدی بطنی واردر . اوبطنلر بزم کوره یوقدر . چونکه زادراک ایدم مدیکمز شیشه معدوم حکمنی ویررز : بزم کویده (بکلر بکنده) عنادجی بر آدم واردی ! برکون فاتحک جمله قاپوسنده زنجیر وارمی ، یوقی ؟ دییه بریسیله بحه طوتوشوب یوق دییه اصرار ایتدی . نهایت قالقوب برابر فاتحه کتیدیلر . زنجیر وار دییه ادها یدن قوجه زنجیری حریفک کوزینه صوقش . نه دیرسکز ، حریف زنجیری ایله طوتدینی ، شانغیر شانغیر صاللا دینی حالده ینه « یوق » دیدم یوق ! دییه عناددن واز کچمدی . آرتیق بویله آدملره نه یاپیلیر ؟ یوق دیدی بتدی . قرآنک نه بطنی وار ، نه ظهری . کاغد اوستنده نه کورورسه او .

حضرت مولانا دییور : سن بیلکه قرآنک حروف و ظروفتک ظاهری واردر . اونک ظاهریتنک ضمیمه ده قاهر ، عظمتلی ، برده باطنی واردر . اونک قهری عظیم . اوبطنک ایچنده بر بطن دها وار . هر کس اوبطنی مدرک اوله ماز . عقللر اورایه کلنجه غائب اولور . فقط سن اونک رجلی دکلک . بورونکک ایلرینسی کوره مزسک . باری یرنده او طورده حدیکی بیل . ناصیل علوم و فنونه ، صنایعه متعلق برشی تکلیف اولوندینی زمان « بیلیم ، یاپه مام ، دیورسک ، بورادده حدیکی بیلیمک آ .

ینه حضرت مولانا دیور : قرآنک دردنجی بطنی اللهدن باشقه کیسه کورمدی .
ای اوغل ! سن قرآنک یالکز ظاهری کورمه . ظواهرینه قصر نظر ایتمه . شیطان
انسانک جسمایتندن باشقه برشی کورمه . نته کیم ابلیس حضرت آدم ایچون اوپله دیدی :
«اونی طوپراقدن ، بنده آتشدن یاراتدک . بن اوکا نصل سجده ایدرم ؟» چونکه آدمده کی
سر الهی بی کورمدی . بر حیوان نه بیلیر انسانک قیمتنی ؟ ابلیس ده اوپله دیدی : آدمک
طینندن باشقه برشی کورمدی . شیطانک طینندن ده آدمیت خاصه سینه انتظار عیشر .
«از طبع دیو خاصیت آدمی محو»

حضرت قرآنک ظاهری شخص آدمی کی در . سزک ، نیم کی برهیکل محسوس
جسمانی ده اوپله در . اوقرآن مبینک شکل ظاهریسی میدانده . هیکز اونی موقع تکریمده
بولوندورورسکز . فقط برووحی وارکه اوکیزلیدر ، خفیدر . اونی بیلیمک ، بولوق ایچون
لازم کلن استعدادی الله ایتمه چالیشمالی . هرشی بویله در . بوخصوصده هم برشی بیلیمز ،
همده آغزینیه کلنی سویلر . ایشته کوجه کیدن بودر . برپارچه ادبکی طاقیکسه ک آ .
برآدمک عمجه سی ، دایسی قرق سنه اونکله برابر بولونسه ینه حالندن برشی کورده من .
سراثرینه ، سرانی نقاطنه انفاذ فکر ونظر ایده من . حال بویله ایکن زیدوعمروربر برینک
احوالندن ناصیل خبردار اولور ؟ هیمزک ادراکی باشقه سی ایچون قاپلی در . حتی نیم سنی
بیلشم کندی شعورم ایچنده . سندن انتقال ایدن فکر می بیلورم دیگدر . عظیم مسئله در بو .
علائقفسک الکهم بر مسئله سیدر . قاریشیدیرسوق بودرس ایله ایکی آی اوغراشمق لازم کلیر .
ایشته قرآن عظیم الشان ... بوکا اینانیرسه ک ، آیاتی قبول ایدرسک . (لوانزلنا هذا
القرآن علی جبل لرآیته خاشعاً متصدعاً من خشية الله وتلك الامثال نضربها للناس لعلهم
یتفکرون) طاغیر - مدار تکلیف اولایدی ده - قرآنی اوزرینه ایندیرمش اولسه یدق
اوقوجه طاغیر خشوعه ، کلیر الله قورقوسندن پارچه پارچه اولوردی . اما طیبی ،
معنانه اطلاع شرطیله . انسانلر تأمل ، تدبر ایتسونلر دییه بزبوامثالی ضرب ایتدک .

الله ضرب مثل ایراد ایدرمی ؟ بزم ایچون ایدر . هر هانکی بر حقیقی بزم ادر اکزمه صوقوق
ایچون فهمی اک سهیل اولان مثاللر ایله تنویر ایدر . (ان الله لایستجی ان یضرب مثلاً
مابعضه فما فوقها) الله سیوری سینکدن بیله مثال کتیر . بوندن استعجیا ایتمز . ایمانی

اولانر بونك حق اولديغنى تقدير ايدرلر . (واماالذين كفروا فيقولون ماذا اراد الله بهذا مثلاً) فقط الله ايمان ايتمه ينلر : «نەدر بوندن اللهك مقصدى؟» ديرلر. يە شيطان خرطومنى قلبه صوقدى . (يضل به كثيراً ويهدى به كثيراً) الله قرأندەكى امثال ايله بر چوقلرينى اضلال ايتديكى كى ، بر چوقلرينى دە مظهر هدايت ايدر . (ومايضل به الا الفاسقين) الله آنحق فاسقلرى اضلال ايدر . باق ؛ بوعظمتى ايله برابر سيورى سينكدن بحث ايدىور ، بونصل شى ؟ آل بر فساد تخمى دها ! بك اعلى ! كنديكى دوشونسهك آ . عوالم غير متناهيە ايچندە كبر جسمانى اعتباريله سنكه سيورى سينك آردسندە نە فرق كور يورسك ؟ فقط سن جسمكه مى انسانسك ، يوقسه روحكه مى ؟ سن نە سين ؟ نيچون جناب حثك طرز تبليغه اعتراض ايدىورسك ؟ صغر جسم اعتباريله سيورى سينكدن سنك نە فرقك وار ؟ فضائى نامتناهيدە كرؤ ارضى آله جقسك ، درده تقسيم ايدە جكسك . اوربەك ايچندە لايعد مخلوقات . اولنرك ايچندەدە بر فرد ناچيز . انسان بويلە مى دوشونولور ؟ انسان جسمائى اعتباريله نە قدر اهميتسزدر . لكن انسانى اعتباريله كون ومكانە صيغماز . حكيم اول . حكمتە موافق دوشون . صاحبه سويلەمە . انسانك انسانى بوهيكل محسوس جسمانى ايله دكل در . اوجوهر كشي ف لاشى حكمنده در . بر حديث قدسيده «بى ارض وسما آماز . آنحق مؤمن قولك قلبى آير .» بويوريلور . باق نە اولديغنى آكلا . اونك ايچون الله سيورى سينكندن بحث ايدر . كندينى بك ذليل طوتمه قرآن سنك ايچن كوندەريلور . سن كنديكى ، يعنى جسمائىكى مساحات هندسيه ايله اولچمە يە قالقيشيرسەك هيچ قيمتك قالمماز . آنحق سندە بر جوهر واردركە نامتناهيلرى ايچنە المشدرك . انسانك بويوكلى بورادەدر . سن كنديكى بر جرم صغير ظن ايدرسك . فقط انسان عالم اكبردر . بوتون عوالم انساندە مندجدر ، منطويدر ، بويلە يرلردە جسمانى بويوكلك ، دهاكو چكلك موضوع بحث اولەماز .

— اوت اما ، قرآنك مندراجاقى بسيط ...

بهي خان ؟ بهي ظالم ! سن اللهك آيات آفاقه سنه باق اللهك اك بويوك قانونى اك بسيط اولانيدر . بساطتدن نه چيقار ؟ قرأندە نيجه حقايق وار . فقط سسندە كورمك استعدادى يوق .

باق بر كره سمايه ، نە كورورسك ؟ بر كونش . اطرافندەدە طانغير طونفور دونن

برکتله ترابه . اونك دونوشندن كيجه كوندوز اوليور . فصول اربعه اوليور . بوندن بسيط برشي اولورمي ؟ اللهم قانونلري دم بويله بسيط . قوجه كره طويلاچ كي دونيور . شو قانونك بساطته باق . صوكره سنك اوكره ارضكده ظهور ايدن نامتناهي حالات غريبه باق . فقط اك غريبي بوقدر بداهته قارشي سن هم اللهم ، همدمه اونك كتابي انكار ايديورسك . ديمك كه برشيئك بساطتي اونك اصلندمكي عظمتي اسقاط ايچون سبب كافي اوله ماز . بساطتي سرشته اتخاذايدرك بونك حكيمي بوقدر ، قيمت علميه سي شوقدر در ديه هذياكاريكه قارشي دينه بيلوركه : سنك قيمت فنيه كده كرده نك طانغير طونفور يووارلامسندن باشقه برشي دكلدر . كرده شوحركت بسيطه نيجه انقلاب يامش . نيجه حيوانات ، نيجه ازهار وجوده كتيرمش . آكلادلومي بساطتك نه اولديغي ! ايشته قرآنك بساطتك ايچنده اويله حقايق واردر كه دنيا ايچنده دنيا يارامش . بوقدر علما ، بوقدر فقها قرآنك عظمت شاني اوكنده سرزمين حيرت اولمشكن سن نه جرائله بوكي ترهات ايله قرآنك عظم شاني تنقيص ايتك ، حائر اولديغي اهميتي اسقاطه ساعي اولمق ايسترسك ؟ بو ، احمقلاغ صوك پرده سيدر .

سوق كلام بزه باشقه سوزلر سويلندي . بزه بووسيله دن بالاستفاده سوزي قرآنه انتقال ايتديرك . بوراده قالسون . الله فرقان حكيمنده كنديسك بر اولديغي بزه سويليور (والهكم اله واحد لا اله الا هو الرحمن الرحيم) شيمدي قرآنه ايمانك وارسا الله ذوالجلال انزال بيورمش اولديني آيتله اكتفا ايدرسك .

— اما بر آزدها توسيع معلومات ايتك ايسترم ..

ديه جكسك . وار ايت . اوندهده باس يوق . اي منكر ، بن سكا خروس عقلی بيله ديه ميه جكم . چونكه خروسك درايتدن صرف نظر ، برحوق محاسني ده واردر . مثلا عالمانه چوق سور . حمايه ي خصوصنده بويوك برغير اظهار ايدر . حريم عصمتنه كيمسي تجاوز ايتديرمز . تجاوز ايدنه قارشي چيرينه رق هجوم ايدر .

پيليچ عقلی ... اوننده ديه ميه جكم ، چونكه ايكي كونك پيليچ آناسنك جناح شفقتنه صغير ، اوراسي كنديسك مأمني اولديغي بيلير . چيلاق كچر كن اورابه قاچوب كيزلنه يي اوكا كيم اوكره ندي ؟ كنديسي تعرض اعدادن حمايه ايچون او جناح شفقتك ملجاء كافل وكافي اولديغي ادراك ايديور . بو بويله اولديني حالده ، اي مخلوقاتك اشرفي اولان انسان !

سن بوقدر تکریم قدرته مظهر ایکن اوتانمەدن ناصیل خالقکی ، اللهکی انکاره جرأت
ایدیورسک ؟ ناصیل اوننی طایماز ، بیلمزسک ؟ شو پیلپیچ قدرده عقلک یوقی ؟ افسوس ،
صدهزار افسوس ! . .

دیمک اولوبورکه عقل صحیح ایله متفکر اولان بر آدام ایچون انکاره مجال یوقدر .
والا پیلپیچ منزلهسنه اینملی . واسفاکی اونک قدرده ادراکی یوق . چونکه پیلپیچده ادراک
وار . آناسنک قانادلری آتنه النجا ایدیور . اوراسی کندیسنی دشمن شرندن محافظه
ایده جکفی مدرک . سنک قفاکده ایسه قوجه بر بین وار . پیلپیچ قدرده می ادراکک یوق ؟
نه ایسه صده کلهلم . ایشته انسانک اللهی بیلمسو ایچون طریق نظرده وار . بو
جهتلرندن ده بحث ایتمک ایسترم .

ففی کل شیء له آیه تدل علی انه واحد

عقلی اولان وجود باری یه کندی وجودیله استدلال ایدر .

(لؤلم یبعث الله رسولا لوجب علی الخلق معرفته تعالی بعقولهم .)

اگر الله رسول کوندرمه مش اولایدی ذوی العقولدن اولان مخلوقات یعنی انسانلر اوزرینه
معرفه اللهی بولمق واجب اولوردی . یعنی الله اوقدر ایندرکه پیغمبر بیله کوندرمه مش اولسه
عقلی باشنده بر آدم انفس و آفاقدمکی آیات بیناتی نظر مطالعهیه النجه مطلقا آتی تصدیق
ایدر . حال بوکه اجزای کائناتک هر بری اللهی بیلیر ؛ قابلیت فطریهسنه کورمه انی توحید
و تمجید ایدر . نرده قالدی که انسان ! (وان من شیء الا یسبح بحمده ولکن لا تفقهون
تسبیحهم .) بوتسبیح اشیایی علماً تصدیق ایدن فلاسفه افرنجده واردر . انشاءالله اونلردن ده
بحث ایدررز . بو بحثک مابعدینی کله جک هفته اکال ایدررز . (ربنا لاترغ قلوبنا بعد
اذهدیتنا وهب لنا من لدنک رحمة انک انت الوهاب .

